

Կ. Ա. ԴԱՆԻԵԼՅԱՆ

## ՀԱՐՈՒԹՅՈՒՆ ԱՐԱՐԱՏՅԱՆԻ ՄԵՍՈՒԱՐՆԵՐԸ

Հարություն Արարատյանը XIX դարի առաջին կեսի հայ մեմուարային գրականության ներկայացուցիչներից մեկն է: Նրա մեմուարաները առաջին անգամ լույս են տեսել 1813 թվականին, Պետերբուրգում, ուսերեն լեզվով՝ «Վարդապատեցի Հարություն Արարատյանի կյանքը...» վերնագրով: 1821 թվականին Հալլենում գերմաներեն և ապա 1822 թվականին Լոնդոնում անգլերեն լեզուներով հրատարակվելուց բացի, այդ գիրքը թարգմանվել է նաև ֆրանսերեն ու վրացերեն և երկար ժամանակ, մինչև XIX դարի վերջերը, համարվել Կովկասի պատմության լավագույն աղբյուրներից մեկը: Պ. Պոռշյանի հայերեն թարգմանությամբ այն լույս է տեսել 1892 թվականին, Թիֆլիսում:

Ներկա հոդվածը նվիրված է Արարատյանի մեմուարաների գրական-պատմական նշանակության պարզաբանման հարցին:

\* \* \*

2. Արարատյանի մեմուարաներն ընդգրկում են մոտ հիսուն տարվա մի ժամանակաշրջան (1751—1797): Պատմական դեպքերով հարուստ ու բազմազան է այդ էպոխան և, կարելի է ասել, անկյունաքարային՝ մեր ժողովրդի պատմության մեջ: Մի անգամ իր համար ուղի հարթած ազգային շարժումը XVIII դարի երկրորդ կիսամյակում այնպիսի շափեր ընդունեց, որ ժողովրդի (մասամբ նաև հարևան ժողովուրդների) կյանքում տեղի ունեցած յուրաքանչյուր պատմական իրադարձություն իր քաղաքական, տնտեսական և բարոյական որևէ արտահայտությամբ կապվում էր այդ շարժման հետ: Ազգային շարժումը որոշում էր հայկական կյանքի ընդհանուր ուղղությունը, ոգին և իմաստը, նրա սոցիալ-պատմական բովանդակությունը:

Արարատյանի մեմուարաները վառ կերպով արտահայտում են այդ էպոխայի մի քանի բնորոշ գծերը, ներքին հակասությունները, լուսավորության պահանջի և եկեղեցու սրբազորած տրադիցիաների գոտեմարտը, նորի ընթացքը և, վերջապես, անհատի տանջալից մաքառումը ինքնաազատագրման համար:

Ծնվելով Վաղարշապատում՝ հայ եկեղեցու այդ ամենահին օրրանում, Արարատյանը ապրել էր դառնություններով լի մի կյանք:

Դեռ երեխա, նա ստիպված էր պայքարել շարիքի դեմ, որը մարդիկ են ստեղծել մարդկանց դեմ, որ շարիք են բերում: Նրա ձգտումները, նրա ցանկությունները յուրաքանչյուր քայլափոխին հանդիպում էին դիմադրության, ծաղրվում էին կամ արհամարհվում: Տգիտության ու խավարի այդ ժամանակներում կրթություն ստանալու ձգտումն անգամ դատապարտվում էր: Արարատյանը

<sup>1</sup> Մեմուարաների առաջարանում Արարատյանն ասում է: Երբ իր հիշողությունները գրել է հայերեն լեզվով և ապա թարգմանել ուսերենի:

ցնցող պատկերներով է ներկայացնում իր մանկության տառապանքները, առանձնապես այն ամբողջ հալածանքը, որ կազմակերպում են գյուղի իշխանավորները՝ որդուն ուսումնական տեսնելու ցանկությամբ տարված այրու, և կրթվելու բուռն տենչով տոգորված նրա փոքրիկ որբուկի դեմ: Մի անգամ գլխորդ հաջողեցնում է բռնել դաշտային աշխատանքներից խույս տված Հարությունին հենց նրանց տան մեջ: Ծեծ ու հայհոյանքով նա ստիպում է մորը և որդուն վերցնել գործիքները և զնալ տանուտերի մոտ: «Նա քաշկռտելով մորս մազերից, ստիպեց իրեն հետևել», — պատմում է Արարատյանը: Բայց այդ արդեն անտանելի էր. «Մայրս թագուղակով խփեց գլխի զխին և արյունաթաթախ արեց նրան»: «Գլխորդ առանց այն էլ քարասիրտ ու անխղճմտանք մարդ էր, միանգամայն կատաղեց, մորս սաստիկ ծեծեց ու, համարյա կիսաշունչ, փողոցում վայր ձգեց:

Այդքանով նա չկշտացավ. տանուտերին թողած՝ ուղղակի վազեց գյուղի կառավարիչ Գալուստի մոտ և դանգատվելով հայտնեց, որ մայրս չի հնազանդվում, ոչ ինքն է գնում բանելու և ոչ որդվոցն է ուղարկում, այլ միայն մտածում է, որ մեզ ուսում տա. մեկին, ասում է նա, կոշկակարի աշակերտ է տվել, մյուսին կարդալ-գրելու<sup>2</sup>:

«Գալուստն այդ ժամանակ կալումն էր:

Նրա հրամանով յուր ստորադրյալներից վեց հոգի իսկույն եկան և մորս մազերից քառք տալով, նրա մոտ տարան:

Եվ ահա ամենայն սառնասրտությամբ նա հրամայեց, որ մի ուժեղ տղամարդ կանչեն և գերմաստի մահակներ բերեն:

Եկավ մի հաստ ու կոպիտ գյուղացի, մորս շալակեց ու յուր ուսի վրայից նրա ձեռները պինդ բռնեց. իսկ մյուսները այնքան ծեծեցին նրան, որ ձայնը կտրվեց ու շորերն արնաթաթախ եղավ»:

Այսպես էր մարդու ճակատագիրը: Եվ ո՞վ է մեղավոր դրանում, — կրթության պակասը, տգիտությունը, — պատասխանում է Արարատյանը: Բոլորովին պատահական չէ, որ նա գյուղի իշխանավորների և իր միջև եղած անհաշտության, կոնֆլիկտի հիմքում առաջին հերթին դրել է ոչ թե աղքատության, այլ կրթության հարցը: Իհարկե, Արարատյանը տեսնում էր հարուստին և աղքատին, նրանց դիրքերի, կոշման, իրավունքների տարբերությունները: Նրա համար իշխանավորը և աղքատ գյուղացին սոցիալապես հակադիր ծայրաթևեր էին: Բայց Արարատյանը իր դեմ ելած գյուղական վերնախավի վերաբերմունքը բացատրում էր կրթության նկատմամբ նրանց ունեցած ատելության: Տգիտությունը նրանց չի ճնշում, չի նվաստացնում. նրանք դրանից ոչ մի անհանգստություն չեն զգում. ընդհակառակը, նրանց հաճելի է տեսնել անկիրթ ամբոխին, որովհետև դա հնարավորություն է տալիս ավելի լավ կողոպտելու, ավելի հանգիստ բանեցնելու, ավելի հեշտ համոզելու նրան, որ այդ այդպես էլ պետք է, որ նրա համար ուրիշ ելք չկա, քան աղոթքը, ծանր աշխատանքը և ենթարկվածությունը: Այսպես է դատում Արարատյանը:

Այն հատուկենտ անհատները, որոնք մեծ զոհողություններով կարողանում են այդպիսի պայմաններում կրթություն ստանալ, ըստ Արարատյանի, արտա-

<sup>2</sup> Վաղարշապատիցի Հարություն Արարատյանի կյանքը, թարգման. Պ. Պ., Խիֆի, 1992, 440:

<sup>3</sup> Ն ու յ ն տ ե ղ ու մ, էջ 47—48:

կարգ մարդիկ են, որովհետև սոցիալական շարիքը՝ աղքատությունը անհնարին է դարձնում ամեն մի ընդունակության զարգացում. նա մարդուն կապում է գորշ աշխատանքին, ծանր, միշտ անտանելի կարիքին: Եթե ինքը կրթություն է ստացել, ապա այդ իր բնական ընդունակությունների շնորհիվ է. «Այն ժամանակվա սահմանափակ լուսավորության պայմաններում, — ասում է Արարատյանը, — ես... նրանց աչքում մի անսովոր, արտակարգ երեխա էի»<sup>4</sup>:

Գյուղում ոչ մի դպրոց չկար: Կային մի քանի մասնավոր ուսուցիչներ, որոնց մոտ դարձյալ հնարավոր չէր կրթված մարդ դառնալ: «Ուսուցման փոխարեն, — ասում է Արարատյանը Տեր-Դարբիսի մասին, — նա ուրիշ ուսուցիչների սովորույթով ինձ օգտագործում էր դանադան աշխատանքներում, իսկ եթե դասեր էր տալիս, ապա անգիր ասելու ժամանակ, եթե պատահեր սխալվելիք անգամ մեկ բառի մեջ, անխնայ պատժում էր, ճիշտն ասած, ուղղակի տանջահար էր անում ինչպես ինձ, այնպես էլ մյուս աշակերտներին»<sup>5</sup>:

Տանուտեր Սահակը իր տխմարությամբ հազիվ թե մրցակից ունենար գյուղում. Արարատյանը ավելացնում է. «Դյուղի մնացած ավագները և հարուստ մարդիկ նրանից խելացի չէին, կամ թե շատ քիչ էին խելացի, խոսքով՝ նրանք համարյա չունեին ոչ բարի սովորույթներ, ոչ զգաստ բանականություն»<sup>6</sup>: «Բնկ գյուղական քահանաների մեծ մասը ոչ միայն չգիտեին բացատրել որեւէ բան, այլ չէին կարող ասել, թե որտեղ է գրված այն, որի մասին հարցնում ես»<sup>7</sup>:

Երբ Արարատյանը հարցուփորձում է փանիկցի քահանային, սա «քաղցր ակնարկությամբ և լուռությամբ» հասկացնում է նրան, որ ավելի լավ է հյուրասիրվել իր սեղանից, քան թե անսպասելի հետաքրքրությամբ իրեն անելանելի դրության մեջ դնել:

Փանիկցի քահանաները միայն Բլուրում չեն. նրանց կարելի է տեսնել և ալանտեղ, որտեղ կա հայ եկեղեցի՝ Վաղարշապատ, Սղնախ, Հոխի, Մոզզով, Գլլար և այլն: Երեխաների ու հանրության դաստիարակությունը իրենց ձեռքն առած, նրանք պատժում են և՛ երեխաներին, և՛ հանրությանը: Այս է Արարատյանի եզրակացությունը:

XVIII դարի վերջերին էջմիածինը Երևանի խանության սահմաններում միակ հաստատությունն էր, որ հարկատու չէր խանին: Նա հարկ էր վերցնում իրեն հնթակա յոթ գյուղերից, ուներ վանքապատկան կալվածներ և ճորտեր: Արարատյանն ասում է, որ գյուղացիները պարտավոր էին աշխատել ոչ միայն իշխանավորների, այլև վանքի համար. «Մեզ բոլորիս քշում էին աշխատանքի... ինչպես սովորաբար լինում է՝ գիշեր ու ցերեկ մերթ վանքապատկան դաշտում, մերթ որևէ ստարշինայի արտում»<sup>8</sup>: Տուն վերադառնալ չէր թույլատրվում. առանց հացի ու ջրի գյուղացիներն օրն ի բուն աշխատում էին դաշտերում. նրանք պառկում էին շոր գետնին, քնում բաց երկնքի տակ, և այսպես օրեր, շաբաթներ...<sup>9</sup>: Ահա գալիս է գյուղացիներից մեկը, որ ստացել է աշխատանքի իր վարձը. «Գյուղի իշխանավորները հրամայում են կանգնեցնել նրան, և պատճառաբանելով, իրր նրա կովը կամ ուրիշ անասունը մտել է իրենց արտը և

<sup>4</sup> Жизнь Артемия Араратского . . . СПб, 1813, часть 1, ст. 89.

<sup>5</sup> Там же, ст. 80.

<sup>6</sup> Там же, ст. 63.

<sup>7</sup> Там же, ст. 154.

<sup>8</sup> Там же, ст. 182 -- 183.

<sup>9</sup> Там же, ст. 75.

տրորել ցորենը, պահանջում են վճարել վնասի համար»<sup>10</sup>։ Եվ այսպես նրանք վարվում են ոչ թե մեկի, այլ բոլոր շունեոր աղքատների հետ,— եզրափակում է Արարատյանը<sup>11</sup>։

Հարկադիր աշխատանքի տարված գյուղացիներին մնում էր հնազանդվել, մնում էր տանել և անարդարությունը, և շարունակել։ Իսկ ո՞ւմ կարող էին բողոքել նրանք։ Բողոքի համար նրանց սպասում էր մտրակը և ֆալախան, անհնազանդության համար ավելի մեծ պատիժը։ Բայց կային մարդիկ, որոնք ըմբոստանում էին հարուստի դեմ ի սեր աղքատի. դրանցից մեկն էր Տեր-Մզրախը. «Նա,— պատմում է Արարատյանը,— ավազակության միջոցով վրեժ էր լուծում հարուստներից աղքատների համար, և վերցնելով առաջիններից ինչքան հաջողվում էր, օգնում էր վերջիններին այնպես, որպես թե տալիս էր հարուստների կողմից յուրացված նրանց ունեցվածքի մի մասը»<sup>12</sup>։ Արարատյանը բացառիկ համակրանքով է խոսում աղքատներին պաշտպանելու ելած այդ քահանայի մասին։ Դա, ի միջի այլոց, միակ քահանան է, որին չի դիպել նրա թունավոր խոսքը։ Պետք է նկատել, որ Արարատյանը Աբովյանից առաջ և գրեթե նույնքան կրքոտ, որքան Աբովյանը, քննադատել է հայ հոգևորականությանը։ Աղքատներին պաշտպանելու ելած քահանայի օրինակը երբեք էլ հակասության մեջ չէ Արարատյանի հոգևորականության նկատմամբ ունեցած կարծիքների հետ։ Բանն այն է, որ Արարատյանը հայ կղերին չի զատում հայ իշխանավորից — նրանք շահագործողներ են, և այս իմաստով ըմբոստ քահանան չի պատկանում նրանց դասին։ Տեր-Մզրախը բանադրված մեկն է, այսինքն եկեղեցուց հեռացված մի անձնավորություն. նա իր դեմ է հանել ողջ հոգևորականությանը, իշխանավորներին և այդ պատճառով նա ժողովրդի մարդն է, աշխատավոր ուսնչպարի զավակը։ «Մերկե-Կուլաբցիք,— պատմում է Արարատյանը,— դառն աղքատ ժողովուրդ էին և միայն իրենց քահանայից (Տեր-Մզրախ) էին ամեն տեսակ օգնություն ստանում»։

Եթե քահանան ճանապարհներին պատահում էր խեղճ մարդի, նա նրան տանում, ճանապարհ էր դնում մինչև մի անվտանգ տեղ, և եթե տեղեկանում էր, որ այդ մարդը աղքատ է և կարիք ունի, օգնում էր նրան որքան իր հանգամանքները ներում էին։

Իսկ ինքը տերտերը իր կողոպտած ավարից ոչինչ չէր վերցնում, բոլորն ուրիշներին էր բաժանում, այնքան լինել, որ մի խեղճ մարդ պատահեր։

Շատ գյուղերի ընտանիք օրհնում էին քահանայի կյանքն՝ իր արած բարերարության համար»<sup>13</sup>։

Տեր-Մզրախի գործունեության նկարագրությամբ առաջին անգամ հայ նոր գրականության մեջ Արարատյանը դուրս էր բերում սոցիալական անհավասարության ու անարդարությունների դեմ ելած ըմբոստ անհատին։

Արարատյանը կարողանում է վարպետորեն կապակցել իր կյանքի պատկերները էպոխայի ընդհանուր նկարագրին։ Այսպես է նա, երբ հաջորդում է իր մոր պատմությունը և կամ նկարագրում իր ճանապարհորդություններն ու թափառումները։

<sup>10</sup> Там же.

<sup>11</sup> Там же.

<sup>12</sup> Там же, ст. 101.

<sup>13</sup> Վաղարշապատիցի Հարություն Արարատյանի կյանքը, իրողման. Դ. Գ. Թիֆլիս, 1892, էջ 80։

«Կյանքի» սկզբում Արարատյանը պատմում է իր տատի գերի տարվելու և նրա աղջկա (այսինքն իր մոր) Չուլախ բեկի մոտ ութ տարի ապրելու ու վերստին քրիստոնեության գիրկը դառնալու ոչ այնքան հավանական, բայց հետաքրքիր և աշխույժ պատմությունը։ Սյուժետային այս հորինվածքը անհրաժեշտ է եղել Արարատյանին պատկերելու 1750—1770-ական թվականների անդրկովկասյան անցքերը, Հերակլի և Երևանի խանի փոխհարաբերությունները, 1779 թվականի վրաց արշավանքը Երևան, Սիմեոն կաթողիկոսի հաշտարար միջնորդությունը պատերազմը կանխելու համար և այլն։ Որպեսզի իր նկարագրությունները միանգամայն արժանահավատ աղբյուր համարվեն պատմության համար և որպեսզի ոչ մի տարակույս չլինի, թե նրանք հորինաբանության արդյունք են, Արարատյանը դիմել է նորից մեմուարին, ինքնակենսագրությանը, այց արդեն իբրև պատմող հանդես բերելով ոչ թե իրեն, այլ իր մորը, որին ծանոթ է եղել ինքը՝ Սիմեոն կաթողիկոսը։ Եթե Արարատյանի մոր պատմությունը դուրս բերվի նրա մեմուարներից և ներկայացվի առանձին, ապա այն կարելի էլինի դիտել որպես յուրահատուկ գեղարվեստական մի ստեղծագործություն։ Իրոք հետաքրքիր ու լավ գրված այդ հատվածը ինքնակենսագրական պատմվածքի առաջին նմուշն է հայ գրականության մեջ։

Վրաստան կատարած իր ճանապարհորդության ընթացքում Արարատյանին հուզում են բոլորովին նոր խոհեր ու ապրումներ։ Ճանապարհները լի են հայ և թուրք փախստականներով, սրանք գնում են Հերակլի երկիրը, որպեսզի վերկեն Աղա Մահմեդ խանից։ Սոված և ուժասուլառ, առանց պարենի նրանք ստաջ են շարժվում, իրենց հետևից միայն դիակներ թողնելով։ «...դրանից երկօրյա ճանապարհի ամբողջ տարածությամբ օդը այնպես ծանրացել էր, որ մենք հազիվ էինք կարողանում տանել այն»<sup>14</sup>։ Բայց ահա զինավառչալ Թիֆլիսը։ Կինի են խմում կամավորները, հանդիսավոր զորաներով քաղաք են մտնում Խմբեթիայից օգնության եկած զորքերը, մարդիկ իրարանցման մեջ են։ Վաճառականները հավաքում են իրենց ունեցվածքը, լսվում է, որ Շահը գրավել է Շուշին և ահա ուր որ է կհասնի Թիֆլիս։

Արարատյանի նկարագրությունները պատմականորեն ճշմարտացի են։ Վրաց և ռուս բազմաթիվ աղբյուրներ լրացնում և հաստատում են դրանք։ Բայց Արարատյանը միայն չի արձանագրում կատարված փաստը, նա նկարագրում է, և այս է, որ նրա նկարագրություններին տալիս է գեղարվեստական արժեք, մի առավելություն, որով և նրա մեմուարները ստանում են պատմագեղարվեստական երկի նշանակություն։

Արարատյանի նկարագրությունները աչքի են ընկնում ոչ միայն իրենց պատկերավորությամբ, նրանց մեջ երբեմն կարելի է հանդիպել մանրամասների, որոնք ծայր աստիճան հետաքրքիր են հեղինակին ըմբռնելու իմաստով։ Այսպես, Արարատյանը պատմում է, որ ինքը տեսել է պարտված Հերակլին, մի ոչխարի մորթի ուտերին գցած, իր հայ խոհարարի պաշտպանության ներքո։ «Իմանալով, որ Հերակլ թագավորը գտնվում է հենց այստեղ, Անանուրում, ևս որոշեցի անմիջապես գտնել նրան», — և նկարագրում է ավերակ եկեղեցու պատի տակ նստած Հերակլին։ — Հորը և ինքնիշխան Հերակլը, որ 40 տարեկան իր պաշտպանում էր թշնամիներից, ընկավ իր ստրուկի՝ Քահմադ Կուլի խանի ներքինու ոտքերի տակ, որովհետև վրաց իշխանները անմիաբան էին

<sup>14</sup> Жизнь Артемия Арапатского, СПб, 1813, ч. I, стр. 283.

և վճռական մոմենտին օգնության չհասան նրան<sup>15</sup>։ Հնարավոր է, որ նա երբեք չի տեսել Հերակլին, հնարավոր է և այն, որ նա, ինչպես շատ այլ դեպքերում, սեփական նկատառումները հաղորդելու համար, հորինում և ստեղծում է քիչ հավանական, համենայն դեպս ոչ պատմական նկարագրություններ, բայց կարևորն այստեղ այն է, որ նրա հորինվածքները սերտորեն միաձուլված են նրա ամբողջ աշխարհայացքի, նպատակների, ինչպես նաև զարաշրջանի մարդկանց մի որոշ մասին խիստ հատկանշական տրամադրությունների հետ, մի բան, որ վերջին հաշվով չի կարող հսկայական պատմա-հանաչողական արժեք չունենալ։ Ֆուրաքանչյուր մեծուարիստ այսպես թե աչնպես միշտ չէ, որ հավատարմություն է հանդես բերում պատմության նրկատմամբ։ Ենթարկված լինելով իր դասակարգի բնդհանուր սոցիալ քաղաքական մտահայացքին, նա պատմությունը վերապատկերում է այդ նույն մտահայացքի սահմաններում, առանց խորշելու բացթողումներից, հորինումից կամ միտումնավոր չափազանցություններից, որովհետև դրանք այնպես, ինչպես քաղաքական հանգամանքների դիվանագիտական մեկնաբանությունները, ծնունդ են առնում տվյալ դասակարգի սոցիալ պատմական շահերի անմիջական ու կոնկրետ հաշվառումից։

Արարատյանը 1796 թվականի դեպքերի մասին գրում էր 1813 թվականին։ Այդ ժամանակ սկսվել էր ռուս-պարսկական պատերազմը և այս անգամ ավելի մեծ ծավալով ու հեռանկարներով։ Արարատյանը հասկանում էր ստեղծված իրադրության ամբողջ արժեքը հայ ժողովրդի մոտալուտ ազատագրության համար։ Եվ նա իր գրքով գալիս էր համոզելու քաղաքական ու ռազմական գործիչներին, որ ռուսական բանակի համար շատ հեշտ է պարսկական խանությունների գրավումը։ «Ռուսական բանակը,— գրում է նա 1796-ի նահանջի առթիվ,— կարող էր առանց որևէ դիմադրության առաջ շարժվել Պարսկաստանի խորքերը, որտեղ նրան ցանկալի էր։

...Ինքը Շահը բոլորովին պատրաստ չէր և չէր կարող դուրս բերել այնպիսի ռեժի, որոնք կարողանային դիմադրավել ռուսական զորքերին։ Ավելին, նրանք (պարսիկները,—Վ. Դ.) չունեն կամ համենայն դեպս այն ժամանակ չունենին հրետանի, որից նրանք սարսափելի վախենում են»<sup>16</sup>։ Ուշագրավ է, որ այստեղ Արարատյանը պարսկական բանակի հրետանի չունենալու հանգամանքը նշում է որպես առկա փաստ։ Սա վկայում է, որ նա գրում էր ոչ միայն ի սեր պատմության։ Այստեղ երևում է նաև իր ժամանակի քաղաքական անցյուղարձերով շահագրգռված մարդը, որի համար անցյալ եղելությունների վերապատմումը որոշ քաղաքական տեսակետի պաշտպանության, առաջադման և հիմնավորման միջոց էր։ Նկարագրելով Դերբենդի գրավումը ռուս զորքերի կողմից, Արարատյանը բավական մանրամասնորեն անդրադառնում է հայերի ռուսներին ցույց տված օգնությանը. նա, ինչպես Բուտկովը, պնդում է, որ Դերբենդի առումը տեղի ունեցավ զրեթե առանց արյունահեղության, շնորհիվ տեղի հայերի ցուցաբերած անձնվեր գործողությունների։ Նրանք բրոնեցին և զլխավոր հրամանատարին հանձնեցին Շեյխ Ալի խանի սուրհանդակներին, որոնք ուղևորվում էին Ռաբու և Ղուբա՝ պաշարված քաղաքին ռազմական օգնություն հասցնելու համար։ Նրանք ցույց տվեցին քաղաքի պլսավոր

<sup>15</sup> Там же, т. II, ст. 45—46.

<sup>16</sup> Там же, т. II, ст. 167—168.

ամբույթյունների ճիշտ տեղը, որոնց գնդակոծմամբ հնարավոր դարձավ մեկ օրվա մեջ ջախջախել բերդի պաշտպանական հզորությունը: Ռուսական զորքերի առաջխաղացումը Ղուբա, Ղարաբաղ, Բաքու կատարվեց անսպասելի հաջողությամբ և առանց նկատելի կորուստների: Դրա պատճառը, ինչպես ցույց է տալիս Արարատյանը, ամենից առաջ պարսկական միասնական պետության բացակայությունն էր, խաների լուրջ տարածայնությունները և աշխատավոր ժողովրդի համակրանքը ռուսների նկատմամբ: Արարատյանը ինչպես իր մեմուարներում, այնպես էլ նամակներում միշտ էլ արժարժեք է ունի և կուկլասյան ժողովուրդների բարեկամության հարցը, մասնավորապես հայերի, որոնք իրենց աղատադրման ամբողջ հույսը և հեռանկարները կապել էին ռուսների հաղթական առաջխաղացման հետ: Արարատյանը ջերմորեն սիրում էր ռուս ժողովրդին, նրա մեծ և հիանալի հայրենիքը: Ահա նրա առաջին տպավորությունը Պետերբուրգից. «Մայրաքաղաքի գեղեցկությունն ու վեհությունը, վեհորեն ընթացող նեվայի հորդառատ ջրերը ինձ մեծագույն հիացմունք պատճառեցին. փայլատակեց հույսի լուսավոր շողը, իսկ նախազգացումը հավաստիացնող ձայնով ասաց ինձ—այստեղ դու կգտնես բո հոգու խաղաղությունը և բո բարօրությունը»<sup>17</sup>: «Ռուսաստանը իմ իսկական հայրենիքն է»,—միշտ էլ ասում էր նա, ճշմարիտ հայրենասերի խանդաղատանքով:

Պետք է նկատել, որ Արարատյանը իր մեմուարները հայերենից ռուսերեն էր թարգմանել ռուս ընթերցողի համար: Եվ դա հասկանալի է: Արարատյանը, ինչպես և նրան ժամանակակից հայ գործիչներից շատերը այն հայացքին էին, թե պետք է հայ կուլտուրան և պատմությունը, այսպես ասած, ժողովրդականացնել ռուսների մեջ, ցույց տալ հայ ազգի անցյալն ու ներկան, նրա հինավուրց հրաշակերտները և խեղճությունը, ավերակների միջից հանող դյուցազնության վաղընջական պատկերները, և սոցիալական թշվառության դժոխային մանրամասները: Այդ կարող էր ոչ միայն հետաքրքրություն, այլև քաղաքական շահագրգռություն առաջացնել մի ժողովրդի նկատմամբ, որ ցանկանում էր հատկապես Ռուսաստանի օգնությամբ ազատագրվել օտարների ճնշումից: Ստեղծված պատմական իրադրությունը արդարացնում էր այդ հայացքը, քանի որ Ռուսաստանի քաղաքական շահերը ըստ էության զուգահեռ պում էին հայերի ազգային շահերին: Եվ դրա համար էլ Արարատյանը իր գրքում բերում է Հայաստանի սկստմական մայրերի ու կոթողների վերաբերյալ բազմաթիվ տեղեկություններ, վերապատմում ժողովրդի զրույցները և ավանդությունները, գնահատում դրանք, Լրբեմն տալիս իր մեկնաբանությունները: Յուրաքանչյուր հնամենի բերդ, փոքրիկ խաչքար, մատուռ, եկեղեցի, քարակույ պարուպի մնացորդ, խարխուլ վանք, մի ձորակ կամ ժայռավոր քարանձավ իր անվան հետ, իր նշանակության շուրջը մի պատմություն ունի հյուսած, մի լեգենդ, մի գրույց, որ ժողովուրդը և դարերը բերել հասցրել են ներկային: Պատմել այդ բոլորի մասին, հաղորդել այն օտար ընթերցողին, նշանակում էր պատմական անցյալը, որի լեզուն իր հուշարձաններն են, դարձնել խոստուն, ինքն իր մասին վկայող: Դրա շնորհիվ մի օտար ժողովրդի աչքում կրթաբանա իր ժողովուրդը, նրա պատմությունը, նրա ստեղծագործ հանճարի հմայքը: Այս էր Արարատյանին առաջնորդող սկզբունքը: Միաժամանակ պետք էր ցույց տալ, թե ի՞նչ է այդ հին,

բայց մեծ ժողովրդի ներկան, ինչ տեսք ունի այն, որո՞նք են նրա համընդհանուր պատկերը բազկացնող հիմնական տեսարանները և արդյոք կա՞ն ալդ տեսարանների մեջ միտիթարական կամ ոգևորող պատկերներ, և եթե չկան, ապա ի՞նչն է դրա պատճառը, որոնք են խոչընդոտները և կամ ինչի՞ց է առաջացել այդ աննախադեպ անկումը: Երկու դեպքում էլ նպատակը միակն էր՝ լայն մասշտաբի նորոգ դարձնել Հայաստանի ու հայ ազգի ազատագրության խնդիրը, մասսայական հետաքրքրություն առաջացնել այդ հերոսական ժողովրդի պատմական բախտի նկատմամբ:

Նախաարժյանական շրջանի հայ գրականության մեջ, էմիլիոյ հետ, Ռեարատյանը երկրորդ հեղինակն էր, որն իր անձնական կյանքի պատմությունը դարձնում էր միջոց այն մեծ պատմական շարժմանը մասնակցելու համար, որ սկսել էր հայ ժողովուրդը հանուն իր ազատագրության: Գրական այդ ձևի առաջացումը կապված էր պատմահասարակական այն նոր պայմանների հետ, որոնք մի կողմից մատնանշում էին միջնադարյան-ֆեոդալական հարաբերությունների քայքայումը և մյուս կողմից մարդկանց սոցիալ-քաղաքական նախկին հայացքների հեղաշրջման անհրաժեշտությունը: Ազգային շարժումը, իր էությունով բուրժուական լինելով, իր հետ բերեց լուսավորության և ազգային վերածնության նոր առաջադիմական իդեաներ, որոնք XVIII դարի երկրորդ կեսից սկսած կազմեցին քաղաքական և հրապարակախոսական գրականության հիմնական բովանդակությունը: Գեղարվեստական գրականությունը, այս շրջանում (հայ իրականության մեջ) ղեկս ի վիճակի չէր պատասխան տալու այն բոլոր հարցերին, որ առաջադրում էին ստեղծված պատմական պայմանները: Մամանակը պահանջում էր ինչ որ նոր և խորապես տենդենցիոզ գրականություն, մի գրականություն, որ ղենք այն հարցերը, որոնք մշակվել էին ազգային շարժման զաղուխահայ գործիչների կողմից (հրապարակախոսական և պատմական գրականություն), և շարունակվում էին մշակվել պատմական յուրաքանչյուր իրադարձության ազդեցությամբ, մի խոսքով առաջացել էր «ժամանակակից առաջին դրականություն» (Էնդելս) պահանջը՝ միջնադարին հակադրվող և ազգի կենսական շահերին համապատասխան: Այդպիսի գրականության առաջացումը չէր կարող միանգամից տեղի ունենալ: Դրա համար ամենից առաջ անհրաժեշտ էր ազգային շարժման գոնե մասնակի հաղթանակը, այսինքն Հայաստանի ազատագրումը և նրա միացումը Ռուսաստանին: Իսկ մինչ այդ սոցիալ-քաղաքական հարցերը, ազգային ազատագրական պայքարի ամբողջ եռ ու ղեռը, լուսավորական-դեմոկրատական իդեոլոգիան արտացոլվեցին մեմուարների, ճանապարհորդական նոթերի և օրագրերի մեջ: Եվ դա հասկանալի է. մեմուարները, ճանապարհորդական հիշատակարանը, օրագիրը գրական այնպիսի ձևեր են, որոնցում եղած տենդենցիոզությունը, կյանքի իրական վերարտադրությունը և գեղարվեստական տարրը հնարավորություն են ստալիս որոշ պայմաններում (ինչպիսին էր XVIII դարի վերջը և XIX դարի սկիզբը հայ իրականության մեջ) և որոշ ժամանակ կատարելու այն դերը, որ նշված էր գեղարվեստական գրականության համար: Այս դեպքում հատկապես կարևոր նշանակություն է ստանում մարդու անձնական կյանքի պատմությունը, որովհետև այն ձուլված լինելով կոլեկտիվ հասարակական ու քաղաքական տենցուդարձերի հետ, արտահայտում է տիրապետող սոցիալականը և այն առանձնահատուկը, որով աչքի է ընկել նույն այդ էպոխան: Մեմուարը դառնում է ժամանակի հասունացած հարցերին պատասխանող այն միջոցն:

լից սեզր, որը շատ սուրյակտիվ լինելու փոխարեն, այնուամենայնիվ քաղաքական պայքարի զենք է, այնպես, ինչպես ներքին հակասություններով ու դրանց խիստ բախումներով հարուստ ժամանակաշրջանում ստեղծված յուրաքանչյուր գեղարվեստական ստեղծագործություն: Մյուս կողմից, անմիջականորեն կապված լինելով հրապարակախոսական և պատմական գրականության հետ, և մեծ չափով ազդված լինելով նրանից, մեմուարները առավել հեշտությամբ էին պրոպագանդում և մասսայականացնում ազգային շարժման գաղափարախոսությունը, որովհետև նրանց գրական ձևը իրոք տալիս էր այդ հնարավորությունը: Մեմուարները բերեցին առաջին գրական պորտրետները, նրանցում երևացին կենդանի մարդիկ իրենց վարք ու բարքով, սոցիալական հոգեբանությամբ, գործողություններով: Ինքնին հասկանալի է, որ ժողովրդական կենցաղի պատկերները, դեպքերի շատ հաճախ վիպականացված նկարագիրը, սյուժետային բազմազանությունը և վերջապես պատմական եղելությունների հետաքրքիր վերապատմումը պետք է, որ մեծ հետաքրքրություն առաջացնեին մեմուարների նկատմամբ: Գրանով պետք է բացատրել, ի միջի այլոց, Արարատյանի մեմուարների չափազանց լայն տարածումը XIX դարի առաջին կեսին:

Արարատյանի «Կյանքը» բացվում է մի առաջաբանով, որտեղ հեղինակը տալիս է իր հուշերի հրատարակման վերաբերյալ անհրաժեշտ բացատրություններ: Նույն առաջաբանում ի միջի այլոց, ասված է. «Հրատարակելով այս հուշերը, ես իմ պարտքն եմ համարում նախազդուլացնել ընթերցողներին, որ իմ կյանքի գրքի մեջ նրանք չեն կարող գտնել ոչ մի տեսակի հեռուորական զարդարումներ, թեև կային տեղեր, որտեղ կարելի էր այդ բանն անել: Ես գրել եմ միայն այն, ինչ ինձ հետ իրականում պատահել է, ոչ մի այնպիսի խոսք չավելացնելով, որը ասված չի եղել և դեռ աշխատել եմ հնարավորին չափ ծածկել շատ բան»<sup>18</sup>: Ուրեմն Արարատյանը կողմնակից է իրականության, ժամանակակից տեղիներով ասած, ռեալիստական պատկերմանը, դեմ՝ կեղծ պաթետիկ գունդարդումներին, մեծամիտ ինքնագովությունը և այլն: Այս նշանակում է, որ Արարատյանի համար ամենազրկավորը պատմության և պատմականի անսքող, ճշմարտացի վերարտադրությունն է: Ունենալով նման հայացք և ստեղծագործական սկզբունք, Արարատյանը աշխատել է գտնել դրանց համապատասխան գրական ձևեր ու հնարանքներ: Գրական ձևը տվյալ դեպքում մեմուարն է, ինքնակենսագրությունը, իսկ սա իրականին, պատմականին հավատարիմ մնալու և այն վերարտադրելու առավել մեծ հնարավորություններով օժտված ձևերից մեկն է: Մեմուարը վերարտադրում է իրոք գոյություն ունեցած եղելությունների ու հանգամանքների մի մեծ ամբողջություն, որի մեջ անձնական կյանքի մի շարք մոմենտներ միաձուլված են հասարականին և ըստ ամենայնի նրա կոլորիտն ունեն: Մասնավորի մեջ արտահայտված ընդհանուրը, անձնականի մեջ գրսևորված հասարակականը, իհարկե, համընդհանուր պատմական կյանքի միայն մեկ կողմն է, միայն մեկ հատվածը և ոչ երբեք նրա ամբողջությունը: Բայց հենց դրա շնորհիվ էլ մեմուարի մեջ արտահայտվում է իրականի և պատմականի միասնությունը: Հենց այս իմաստով, ինչպիսին էլ լինի մեմուարների ստեղծագործական մեթոդը, այնուամենայնիվ, նա այսպես թե այնպես ավելի մոտ է կանգ-

<sup>18</sup> Там же, 1813, ч. I, от издателя

նում իրականությունը, և վերարտադրվում է այն՝ ավելի քիչ դիմելով պոետական Ննարամտություններին և երևակայությանը (այն ինչ Արարատյանն անվանում է հեռորական վարդարումներ): Այստեղից էլ բխում է մեմուարիստի ձգտումն ամեն կերպ ճշմարտապատում դարձնել իր նկարագրությունները, վկայություններ բերել, հաճախ հիշատակել ժամանակակից և պատմական արվարձաններ, մի խոսքով մասնավոր կյանքի հանգամանքները մոտեցնել պատմական իրականությանը և համապատասխան դարձնել նրան: Արարատյանը մեկն է այն մեմուարիստներից, որի համար գերադասելի է լինել տարեգիր-պատմիչ, քան հուշագրող մեմուարիստ: Այդ պատճառով նա ամենուրեք աշխատել է իր անձնական կյանքի դրվագները զուգակցել պատմականին կամ դարձնել նրա մի մասը:

Եթե այդ զուգակցման համար անհրաժեշտ դրությունները պակասում են, ախիսքն անձնական կյանքի դրվագները և պատմական իրադարձությունները ուղղակիորեն չեն կապվում միմյանց, Արարատյանը ստեղծում է տեսարաններ, որոնց դասավորում է այնպես, որ այդ կապը դառնում է միանգամայն որոշակի: Այսպես, օրինակ, իր հաղորդած փաստերն ու տեղեկությունները վախճանական և ճշմարտապատում դարձնելու նպատակով Արարատյանը դուրս է բերում մի անձնավորություն, որը որպես տկանատես պատմում է անցյալի պատմական իրադարձությունների մասին (այսպես է Արարատյանի մոր պատմությունը)<sup>19</sup>:

Այս գրական ննարանքը որքան էլ նախ, բայց և այնպես ուներ մի շատ արժեքավոր կողմ. այդ այն էր, որ պատմական անցյալը վերարտադրվում էր որոշ վիպականացմամբ, մանավանդ, երբ ականատես-հուշապատմողը իր արկածները ներկայացնում էր խիստ հետաքրքրաշարժ և երբեմն էլ ծայրահեղ ուժանտիկ զույներով: Պատմագրական այդպիսի հորինվածքները ավելի շուտ էին հասնում ժողովրդին և դառնում նրա սեփականությունը:

Արարատյանը հաճախ ավանդության սյուժեն օգտագործում է իր ապրած իրականության մի քանի կողմերը բացահայտելու համար: Խնուսի հայ քահանայի աղջիկը, որին բնությանը կնության էր վերցրել տեղի թուրք փաշան, մի քանի տարի հարեմում տառապելուց հետո, հաջողեցնում է փախչել իր նախկին ամուսնու հետ և հասնել Վաղարշապատ: Զարմանալի գեղեցիկ ու քնքուշ էր Մանուշակը, արտևանունքները սև էին ու սրածայր, աչքերը ծովի պես լալածոտ, «Մեր գյուղի իշխանները, — պատմում է Հարությունը, — և առհասարակ նրանք, ովքեր յուրյանց հարստությունով համարված էին մեզանում

<sup>19</sup> Անցյալի մեր քննադատներից մեկը (Արիստակես Եսայակոպոս Սեդրակյան) նման հորինվածքների հանդիպելով Արարատյանի «Կյանք»-ում, նրան բախտախնդիր և միտոի-ֆիկտոր է համարել: չգլանալով մի ամբողջ գիրքը գրել այդ բանն աշտցույցելու համար (տես, Հարություն Արարատյանի կեղծիքը, գրեց Ա. Ե. Ս. Բարու, 1894 թ.): Վերագրատին առաջնորդող նպատակը եղել է հայ եկեղեցու շահերի պաշտպանությունը: Արարատյանին պատմության կեղծարար դուրս բերելով, նա դրանով ուղղում էր ձրել այն հուժկո քննադատությունը, որ իր դրուում ծավալել էր Արարատյանը հայ եկեղեցու և հողերականության դեմ:

Հատկանշական է, որ այդ նույն հնարանքը 1880-ական թվականներին օգտագործել է Պալուստ Երմաղանյանը իր «Համապարհորդություն Հայաստանում» (Կոնստ, 1883, № 3) պատմագրական երկի մեջ: Նախադիվանքի շրջակա բարածերպերում Շերմաղանյանը հանդիպում է 90-ամյա մի ճղնավորի: Սա որպես ականատես ամենայն մանրամասնությամբ նկարագրում է Լեզա Մահմեդ Խանի վրաստան կատարած արշավանքը:

ուժի տեր մարդիկ, Մանուշակի մեր գյուղը ոտ դրած օրից անդադար աշխատել էին նրա յարեհաճ համակրանքին արժանանալ»<sup>20</sup>։ Մի գիշեր էլ նրանցից մի րանիսը «հավաքվում են և դալիս մտնում այն տունը, ուր Մանուշակն ու յուր ամուսինն էին ապրում։ Նրանք դռները կոտրատում են, և առանց նրա համաձայնությանն սպասելու, բռնաբար բավականություն են տալիս իրենց շար տընփանքին»<sup>21</sup>։ Մանուշակը այլևս չէր կարող մնալ Վաղարշապատում։ Նա ծածուկ հեռանում է գյուղից և գնում Բայազետ, ուր շուտով ընկնում է տեղի փաշայի ձեռքը, որը և աշխատում է դավանափոխ անել նրան։ «Մանուշակը մերժեց ամենը՝ հարստություն, սեր և սուտ Մարգարեին»<sup>22</sup>։ Մանուշակին դատապարտում են քարկոծության։ «Նույն գիշեր Մանուշակի նահատակված տեղը լույս ծագեցավ»<sup>23</sup>։ Այս տեսիլքից սքանչացած մահմեդական և քրիստոնյա ժողովուրդը Մանուշակի դին տեղափոխում են Ծիրանավոր եկեղեցու բակը և թաղում այնտեղ»։ «Սա կամեցա անպատճառ անձամբ ստուգել պանդոկապետի հաղորդած տեղեկությունը. մյուս օրը գնացի Մանուշակի սպանության տեղը և իսկապես, որի մեջ գտա շատ արյունաթաթախ քարեր»<sup>24</sup>։ Դժվար չէ կռահել, որ Վաղարշապատի հարուստների նույնպիսի վարքագիծը մերկացնելու համար է Արարատյանը որպես եղևություն պատմել պանդոկատիրոջ զրույցը։

Պատմական իրադարձությունների տենդենցները ավելի ցայտունորեն ցույց տալու համար Արարատյանը հաճախ սրում, չափազանցում է եղևություններին իրական գույները, հատկապես, երբ ներկայացնում է անարդարությունը, կեղծիքը, շահագործման եղանակները, բիրտ ուժի կամայական գործողությունները և այլն։ Այդպես է տրված էջմիածնի հոգևորականության նկարագիրը, հարուստների, կառավարիչների ու ստարշինանների վարք ու բարքի, գործողությունների տիպակարը։ Չափազանցումը, խիստ սև գույները, մարդկանց արտակարգ հրեշավորության ընդգծումը Արարատյանի համար եղել է միջոց, իր ապրած կյանքը պատկերելու այնպես, որպեսզի մարդիկ ավելի շատ ամոսոսանք զգան իր ճակատագրի, իր անձի համար, որպեսզի նրանք, ինչպես ինքը, ատեն խավարի ու տգիտության այդ աշխարհ և տեսնեն, որ մարդ արարածը «տարաբախտաբար ավելի հակամիտ է դեպի շարությունը, նախանձը, ատելությունը և դեպի ամեն տեսակ հանցանքները»<sup>25</sup>։ Հենց դրա համար էլ Արարատյանը պատմում է այն ամենը, որ այլ դեպքերում կարող էր նվաստացուցիչ և իրոք վիրավորական լինել իրեն՝ պատմողի համար։ Դրանով Արարատյանը ցույց էր տալիս, թե տաղանդը, լուսավոր մարդը, բարձր անհատականությունը ինչպես կարող էր ծաղրվել ու ետին ծայր թշվառության հասնել վայրենի բարքերի ու սոցիալական աղաղակող անարդարությունների այդ երկրում։ Արարատյանը իրեն հակադրում է իր միջավայրին. նա բարձր է կանգնած նրանցից իր անհիշաչար ու առաքինի նկարագրով, իր ինտելեկտուալ կարողություններով, մերձավորին, ընկածին անվերապահորեն օգնելու համոզմամբ և ձգտումով։ Այդ պատճառով նա միշտ էլ կոնֆլիկտի մեջ է իր շրջապատի հետ, նա չի հաշտվում նրա հետ, ըմբոստանում է, քննադատում, ծաղրում, բայց և

<sup>20</sup> Հարություն Արարատյանի կյանքը, Թիֆլիս, 1894, էջ 109։

<sup>21</sup> Ն ու յ ն տ ե գ ու մ, էջ 110։

<sup>22</sup> Ն ու յ ն տ ե գ ու մ, էջ 111։

<sup>23</sup> Ն ու յ ն տ ե գ ու մ, էջ 111։

<sup>24</sup> Ն ու յ ն տ ե գ ու մ, 1892, էջ 111։

<sup>25</sup> Ն ու յ ն տ ե գ ու մ, էջ 101։

անխուսափելիորեն պարտվում, որովհետև միջավայրը կայուն է, դիմացկուն, հովանավորված ուժի ու կամայականության օրենքներով: Արարատյանը իր նպատակներին մեծ մասամբ հասնում է չափազանցներով, սրելով շրջապատի ու իր միջև եղած այդ կոնֆլիկտը: Մարդկային հարաբերությունները նա դարձնում է խիստ պարզ, ավելի ճիշտ ցուցադրում միայն այն կողմերը, որը պետք է վերացնել կամ խրախուսել: Այդ պատճառով էլ նա նենգամտության ու առաքինության, խորամանկության ու պարզասրտության, շահամոլության ու անկաշառության, շարի ու բարու հատկանիշները այնպես է բաշխում իր նկարագրած անձնավորությունների մեջ, որ մեկը դառնում է բոլոր շարությունների մարմնացում, մյուսը բոլոր առաքինությունների հրեշտակ: Այս ուղղագծությունը ունի և՛ իր առավելությունները, և՛ իր թերությունները: Սոցիալական կյանքի խստապարզ նկարագրությունները նրա մեմուարներում հաճախ նատուրալիստական են: Այստեղ չկան ընդհանրացումներ, ինքնաբուխ էմոցիա, որ վարակեին իրենց անկաշկանդվածությամբ. չկան գույներ, որոնց ներդաշնակության մեջ թաքնվեր գեղարվեստական հաճույքը. չկան արտակարգորեն վսեմ զգացումներ, լայնարձակ խոհեր, որ կաշկանդեին ընթերցողին կամ թևավորեին նրան մի անհայտ երազանքով. մի խոսքով չկան տաղանդով ուրվագծված մարդկային անհատականություններ: Բհարկե, սա գրական անփորձության հետևանք է, գեղագիտական անկարողության արտահայտություն: Բայց այն, ինչ պարտադիր է բանաստեղծին, պարտադիր չէ մեմուարիստին: Արարատյանը չի էլ ձգտում հասնել բանաստեղծականության: Նրա համար կարևորը փաստի արձանագրումն է, թող այն լինի այլանդակ, որքան կարող է սև, նույնիսկ անգույն, միևնույն է, միայն թե փաստը, եղելությունը հասնի ընթերցողին՝ իր դարձելիության բոլոր մանրամասներով: Սերբերովի ձին սատկել է ճանապարհին. Հարությունը կտրում է ձիու ականջները՝ տիրոջը ցույց տալու և արդարանալու համար. «Այդ ժամանակ,— պատմում է Արարատյանը,— նա (Սերբերովը.— Կ. Դ.) բղավեց ինձ վրա և թքեց աչքերիս մեջ»<sup>26</sup>:

Արարատյանի ստեղծագործական մեթոդի այս առանձնահատկությունները ցուցադրում են հայ նոր գրականության կազմավորման էպոխայում գրական կուլտուրայի վիճակը:

2. Արարատյանի մեմուարները անկասկած հայ նոր գրականության առաջին նվաճումներից են:

<sup>26</sup> Жизнь Артемия Араратского, СПб, 1813, часть II, ст. 194.